



**2016-imut Aningaasanut inatsisissatut siunnersuut.**

Aningaasanut inatsisissatut siunnersuutip siullermeerneqarnerani Partii Naleqqamiit oqaaseqaativut innersuussutigalugit suliap aappassanneerneqarnera imannak oqaaseqarfigissuarput.

Aallaqqaasiullugu Partii Naleqqamiit assut iluarisimaarparput nioqutissat ilaannut aammalu ikummatissanut naalakkersuisut akitsuusiiniarneringaluat tunuartinneqarmat, tassami Partii Naleqqamiit taakkununga annertuumik akerliusimavugut, nalunnginnatsigu, naalakkersuisut siunnersuutaat piviusunngortinneqaralarpat, tamanna aalisartunut, inuussutissarsiortunullu allannut, minnerunngitsumillu inuiaqatigiinnit pissakkinnerusunut ajorluinnartumik sunniteqartussaasoq, taamaattumik partiit akerliunitsinnut isumaqataallutik, siunnersuutinik taakkuninnga tunuartsiniaqataasimasut Partii Naleqqamiit qutsavigangut.

Taamaammallu aamma allannguutissatut siunnersuutit ilai akuersaarlugit taaseqataasinnaavut, kisianni soorunami akuerinngisavut akerliulluta taasiffigiumaarpavut.

Kisianni taama oqareerluta Partii Naleqqamiit tunngaviatigut isumaqatiginngilarput, naalakkersuisut aaqqissuusseqqinniarnermi innuttaasut pissakinnerit siulliullugit aallerfiginiarsarimmatigit, tassami Partii Naleqqamiit aamma siunnersuutip siullermeerneqarnerani ersarilluinnartumik oqaatigaarput, aningaasarpasuit nunatsinniit ukiut tamarluinnaasa aniatinneqartut, sullissinernut assigiingitsunut tunngasut, sipaarfigineqarnissaat pimoorullugu ujartuiffigineqartariaqartoq, innuttaasut pissakinnerit kaasarfiit imaqanngereertut “putoorniaannarnagit”.

Tassami suli Partii Naleqqamiit aaliangiusimavarput, minnerpaamik sillimmasiisarnernut aamma nunatta avataaniit siunnersortinik atuinernut aningaasarparujussuit atorneqartartut ilaasa sipaarfigineqarsinnaanerat pimoorunnerusariaqartoq.

Tassami 2014-imi siunnersortinut avataaneersunut 162,7 mio kr-init nunatta karsianiit aningaasartuuteqarfigineqarsimapput. Taakku sunorpiaq atorneqarsimaneri aamma qanoq

pisariaqartigineri pillugit § 37-ikkut qanittukkut apeqquteqaqqinnitsigut paasivarput, taamaammaat aningaasat taakkununga atorneqarsimasut katillugit 23 mio kr.-init missai naalackersuisuniit nassuiaatissaqartinneqartut, taamaammat tassuuna takusinnaavarput aningaasarpasuit tassuuna aamma aaneqarluarsinnaangaluartut.

Aamma Namminersorlutik Oqartussani suliffeqarfiutitta, nakkutigineqarnerulernerisigut, minnerunngitsumillu piumasaqarfiginerulernerisigut, suliffissat amerlanerusut maani nunatsinni pilersinneqarsinnaasut Partii Naleqqamiit qularutiginnilarput.

Tassami qanittukkut § 37-ikut apeqquteqarnitsinni paasisatta ilagaat Royal Arctic Line Aalborg-imi katillugit 177-inik sulisoqarpoq, tamarmik danmark-imut akileraartartunik.

Royal Greenland A/S katillugit 1.906-isut, taakkunanga 979-it nunatsinni sulipput, danmark-imi 200 nunanilu allani katillugit 727-it Royal Greenland-ip sulisoringai paasitinneqarpugut, tassa naatsumik oqaatigalugu, maani suliffissaaleqinerujussuaqaraluartoq, nunani allani inunnik 1000-ikit sinnerlugit sulisitsivugut, Suliffeqarfiutivut nunani allani immikkoortartaqartut tamaasa ilanngullugit.

Taamaammat Partii Naleqqamiit tamakku tamaasa nalilersorluartariaqarivut isumaqarpugut.

Suliffissaaleqisut suli amerlavallaarujussuarput, taamaammat aamma nunaqarfinni illoqarfinnilu tunisassiorfeqarnikkut, tunitsiveqarnikkullu naalackersuisut qanoq pilersaaruteqarnerisut apeqquteqarfigisimangaluarpavut, kisianni maannamut erseqqissumik akissuteqarfigineqarsimanngilavut, naak tamanit ilisimaneqaraluartoq, pingaartumik nunaqarfinni aalisakkanik amingaateqarfiunngitsuni tunitsiveqarnikkut aalisartunut akimmisaartitsijuarneq pissutigalugu suliffissaqartitsineq aningaasarsiornerlu sumiiffiit ilaanni uninngatinneqartarpoq akuersarneqarsinnaangitsumik.

Aamma sumiiffiit ilaanni nalunngilarput, aalisartut aamma aalisarnermik inuussutissarsiteqarsimangaluartut, aalisarnermut akuersissutinik tuniumaneqanngitsut aamma inuuniarnikkut assut ajornartorsiortinneqarmata.

Ilumullimi aalisartut tunitsiveqarnikkut, aalisarsinnaanermullu akuersissutinik tuniumaneqaratik uninngatinneqanngikkaluarpata, tamanna nunatta suliffissaqartitsinikkut aningaasarsiornikkullu qanoq atsigisumik iluaqutaasinnaanera naalackersuisuniit aaqqiivigineqarsinnaangaluarpat, qularnannigilaq aningaasanut inatsisissatut siunnersuut taamarujussuaq amingartooruteqassanngikkaluarpoq.

Raajartassat qujanartumik amerlisinneqarnissaannik ukiorli Partii Naleqqamiit piumasqaateqarnerput tusarneqarsimanera pissusissamisoorluinnarpoq, tamannalumi aamma landskarsimut amingartoorutit suli amerlanerunissaraluinik pinngitsoortitseqataasussanngorpoq.

Qanorli saarullipassuit suli pitsaanerusementik atorluarneqaralarpata.

Partii Naleqqamiit erseqqissaqqissuarput, sinerissap qanittuani aalisakkanik akitsuusiiniarneq akuersaannnginnatsigu, tassami siunnersuutip siullermeerneqarnerani aningaasanut inatsisissatut siunnersuummi imannak allaqqasoqarpoq:

“aalisakkaat suungaluartulluuniiit tamarmik aallaaviatigut inuiaqatigiinnut tapertaassasut, tassa sinerissamut qanittumi avataasiorluniluuniiit aalisarneq pineqaralarpalluuniiit. Tamatuma kinguneranik aalisakkat tamarmik , soorlu saarulliit, sulippaakkat, nipisaallu akitsuuserneqassapput”.

“tamatuma kinguneranik 2016-imi 15 mio. kr.-nik 2017-imiillu 50 mio. kr.-nik isertitaqarnerusoqarnissaa missingersuusiorneqarpoq”.

Kisianni tassa suliap siullermeerneqarnerata kingorna aalisakkanik akitsuusiinissamut tunngasut paasiuminaangaaramik, qanorluuniiit sumut maannakkut killiffeqarnerisut takujuminnaappoq.

Suliffissaaleqineq akiorniarlugu siorna immikkut aningaasaliissutit 174,2 mio kr.-init nunguppata, naalakkersuisut qanoq allamik/allanilluuniiit pilersaaruteqarpat, maannakkut sulisinneqartut sunut innersuunneqarniarpat ? qanorlu ingerlariaqqissappat ?

Aamma ukiap ingerlanerani naalakkersuisunut apeqquteqarnitsinni aamma paasivarput, nukissiuuteqarnermut atatillugu el-værk-iniit imeq kiattoq sipporuttoq atorneqanngittoortartoq ukiumut 39 mio kr.-init missaani naleqartoq atorneqanngittoorluni “silaannarmut” eqqarneqartoq.

Taamaammata-una Partii Naleqqamiit ilungersuutigigippat, pissutsinik immaqa ileqquliutiinnarneqarsimasunik allanngortitsinissaq, isumaqaratta inuiaqatigiinni PISUSSAAFFILERSUINERIT aamma suliffeqarfiutitsinnut tunngasut aamma eqqartornerusariaqarivut, inuiaqatigiinnullu pitsaanerusementik sunniuteqarnerusementillu angusaqarnerusinnaaneri sulissutigineqartariaqartut.

Nunatsinni maani nunaqavissut ujaqqanik pinnerasaasiassanik inuussutissarsiutigalugu ingerlatsisinnaanerat annertunerusementik pitsaanerusementillu inatsisitigut periarfissinneqartariaqarput, tassami ujaqqat piiarneqarunik katersorneqarunilluuniiit nunguttussaapput, taamaattumik

aallaqqaataaniilli ujaqqanik pinneraasiassanik katersisarneq ujaasisarnerlu mianersuuttariaqarparput, ukiorparujussuarnimi takoreersimavarput, nunatsinni pissuussuterpassuit assigiinnigitsut allamiuniit annissuunneqartut.

Aamma rubin-it ukiorpassuarni misiliutitut taallugit annissorneqarsimasut, qularnanngitsumik nalitoorujussuit, nunatsinnut utertinnissaat iluaqutiginnissaallu eqqumaffiginerullugulu suliniuteqarfiginerusariaqarparput. Misileraatit ajorsimannngimmata, maannakkut rubin-isiorneq aallartereerpoq.

Taamaattumik rubin-it ukiorpassuarni annissorneqarsimasut utertinnissaat aningaasatigullu iluaqutiginnissaat ujartornerusariaqarparput.

Qanittukkut tusagassiuutitigut tusarparput, Tasiilami suliffeqarfiit namminersortut ilaat akiliisinnaajunnaarluni unissimasoq, taamaalillunilu sulisut 30-it missai suliffissaarussimasut. Illoqarfimmut inuusutissarsiornikkut periarfissaqartitaanngereersumut pisoq ilungersunartorujussuungunarpoq, minnerunngitsumik sulisunut ilaqtariinnullu taama nalaataqartunut.

Partii Naleqqamiit assut paasiuminaatsipparput naalakkersuisut pisumi qisuariaateqanngimmata, tassami sumiiffimmi pineqartumi pisoq allaat ajunaarnersuartulluunniit nalilerneqarsinnaangajappoq, tassali Tasiilami nunaqarfittaanilu inuusutissarsiornikkut, ilami allaat sanaartornikkulluunniit suliassaqartitsineq annikeruttormat.

Uffa-massa Tasiilap eqqaani nunaqarfiillu ilaanni aalisarnikkut pimoorussinerusumik piorsaasoqarpat, inuit nammineerlutik imminnut napatinniarnerat nukittorsarneqangaassangaluartoq.

Kisianni tassa naalakkersuisut nipaarsaartutut ipput.

Tupinnaqaaq aamma meeqqat atugarliortinneqartut pillugit, meeqqat illersuisuata nunatta avannaani angalareernerata kingorna naalakkersuisut qanoq iliuusissamik piaarnerpaamik aaqqiiniuteqarlutik iliuuseqannginnerat, naak meeqqat suminginnarneqartut, ilami allaat kinguaassiuutitigut atornerlunneqarsimasut pillugit meeqqat illersuisuat ilungersorluni tusagassiuutit aqqutigalugit oqariartuuteqaraluartoq.

Manna iluatsillugu meeqqat illersuisuat Partii Naleqqamiit qutsavingaarput, sulineranilu tapersorsorlugu, meeqqat atugaannut tunngasut nipangiutiinnarnagit saqqummiimmagit.

Partii Naleqqamiit aamma isumaqarpugut meeqqeriveqarnermut tunngasut aningaasanut inatsimmi sammineruneqartariaqartut, tassami angajoqqaarpoq aamma arlinnik meeralinnik.

Nalunngilarpullu meeqqerivimmiisitsineq qanoq akisutigisoq, soorlu tamakku eqqarsaatigalugit aamma angajoqqaat oqilisaaffigineqarsinnaaneri, meeqqat pitsaasumik ineriartortinnissaannut pingaarutilerujussuusoq Partii naleqqamiit nalunngilarput. Taamaammat tassuuna aamma meeqqat illersorneqarnerunissaat qulakkeerneqarsinnaavoq.

Nalunngilarput nunaqarfinni meeqqeriveqarnikkut assorujussuaq amingaateqartoqartoq, tamannalumi pillugu aamma Partii Naleqqamiit, inatsisartut upernaq ataatsimiinnitsinni ilaatigut Kullorsuarmi meeqqeriveqalernissaq pillugu siunnersuuteqarsimangalarpugut, kisianni ajorluinnaraluartumik inatsisartunit partiinit allanit itingartinneqartumik.

Taamaattumik Naalackersuisut kaammattorniarpavut, aamma nunaqarfinni meeqqeriveqarnermut tunngasut pillugit kommunit oqaloqatigisariaqaraat, tassami ataatsimoorluni aaqqiinarneq aamma tamatumani meeqqanut atugassarititaasunik pitsanngorsaaneermik kinguneqassammat.

Soorlu uuma suliap siullermeerneqarnerani aamma nunatsinni sulisut aningaasarsiaqarnerannut tunngasut paasissutissat naatsorsueqqissaartarfimmiit saqqummiunneqartut eqqaasitsissutigigivut. Tassa tassuuna ersarissorujussuarmik takuneqarsinnaammat, inuiaqatigiit 64,2 %-tii ukiumut 200.000 kr-init inorlugit aningaasarsiaqartut.

Taassuma saniatigut suliffissaaleqisut aggusti qaammat 2712-isut oqaatigineqarput.

Taamaattumik tupinnanngitsumik qulaani paasissutissat takutippaat, ilaqutariit inuillu ataasiakkaat qanoq akissarsiatigut appasitsigisumi inissisimasut.

Aamma tamatuma paasinarsisippaa, ukioq naalackersuisunut apeqquteqarnitsinni, inuit ilaqutariillu inigisaminniik akiliisinnaannginneq pissutigalugu anisitaasiamat ikigisassaangitsut, sulilu taamanikkut inuit ilaqutariillu anisitaasussanngorsimasut 398-iusut. Qanittukkut naalackersuisunut apeqquteqaqqinnitsinni paasivarput, tassa ukiup affaata missaata qaangiunnerani, inuit ilaqutariillu inigisaminniit anisitaanissaannut suliassat 907-it politiinut tunniunneqarsimasut.

Partii Naleqqamiit paasisinnaalluarparput, inuppassuit ulluinnarni angummanniapiloorlutik inissisimanerat aamma suliffissaaleqinerup tamanna suli ajornerulersittarmagu. Taamaattumik

ataasiarata inimi maani maannamut siunnersuutigingaluarparput, ineqarnermut tapiissutitut (boligsikring) kiassarnermut akiliutit ilanngunneqassasut. Tamannalumi sulii aaliangiusimavarput.

Meeqqat angerlarsimaffiup avataanut inissinneqartartut 2014-imi septemperi qaammat tikillugu 642-inik amerlassuseqartut naalakkersuisuniit paasissutissiissutigineqarput. Taakkunungalu pisortat aningaasartuutaat katillugit 236 mio kr.-iniusut.

Taamaattumik tassani aamma aqqissuusseqqinnissaq pisariaqarluinnartoq Partii Naleqqamiit isumaqarpugut.

Paasisavut naapertorlugit meeqqat inuusuttullu suliniaqatigiiffiata Sorlak-p aningaasatigut Naalakkersuisuniit paaaffiginiarneqarneringalua iluatsinngitsoortoq paasivarput, tamannalumi Partii Naleqqamiit iluaraarput, aamma uagut Sorlak-p siulersuisuisa ataatsimeeqatigereernerisa kingorna naalakkersuisunut apeqquteqaateqaratta, kisianni maannamut akissuteqarfigineqanngitsumik. Taamaammat ilaatigut aamma paaserusupparput, meeqqat inuusuttullu peqatigiiffippassui, naligninnaasumik ukiakkut tipsernermut lottornermullu aningaasaliissutiniit qinnuteqartitsisarnermut atatillugu, peqatigiiffiit qassit qinnuteqarsimanersut aamma peqatigiiffiit qassit tapiiffigineqarsimanersut ?

Kiisalu ICC-mut aningaasaliissutit ikiliniarneqarnerat aamma Partii Naleqqamiit erserinnerusumik nassuiaateqarfigineqarnissaat piumasaraarput.

Soorlu utoqqalinersiuteqarneq pillugu pkt. 160 maani oqallisigingatsigu, atorfillit kattuffiisa inatsisartutnut saaffiginnissutaa oqaatigigipput, taamaammat tjenestemandit utoqqalinersiassanut katersaasa siuartitsilluni akileraaruserneqarnissaat Partii Naleqqamiit akuersaanngilarput.

Angallannermik aaqqiineq (ajorseriartitsineq): Siullermik angallannermi aaqqiinnerup pingaarnerpaatut tunngavissaa Partii Naleqqamiit eqqaasitsissutigeqqillarput, tassalu angallannermi aaqqiinnerup tunngavigisussaavaa sumiikkaluaruttaluunniit – upalungaarsimaneq innarlernagu angalasumut inuiaqatigiinnullumi akikinnerpaamik aaqqiinissaq.

Aningaasat dkk 3-400 miliuunit atorlugit aaqqiisinnaavugut sinerissami sumiiffinni arlalinni mittarfiliornikkut taassumallu saniatigut inuiaqatigiit amerlanerussuteqarluartut akissaqarfigisinnaasaannik timmisartuutiqatigiiffiliornikkut.

Assersuutigalugu Qeqertarsuup tunuani massakkt aaqqissuusineq tunngavigalugu ukiup affaata iluani periarfissaavoq Ilulissat Qasigiannguillu akornanni qulimiguulik atorlugu siumut utimullu dkk 2.700,00 sinnerlugit akiliilluta angalanissatsinnut, qaavaticullu nunatta karsianiit kiffartuusinnissamut isumaqatigiissut tunngavigalugu dkk 20 miliuunit miss tunniunneqartarlutik.

Timmineq 15 minutsit missaani sivikitsigaaq. Qasigiannguani mittarfiliornikkut angalaneq taanna tapiissutitaqanngitsumik (massakkt dkk 2.700,00-lik) siumut utimullu akeqalersinnaavoq dkk 800,00 imaluunniit kiffartuusinnissamut isumaqatigiissutit attatiinnassagaanni akeqalersinnaalluni dkk 300,00 imaappoq massakkt akiliutigineqartartup 10%-iata missaa (ileqqaarut 90% miss.). Takorloorneqarsinnaavoq pissutsit taamaattut inuiaqatigiit kalaallit ulluinnarileraluarunikkit angallannerup qanoq isikkoqarnerata allanngorluinnarsinnaavoq inuiaqatigiinnut malunnaateqarluartumik pitsanngoriaatitalimmik.

Assersuut qulaani taaneqartoq uppersaataitaqarpoq aammalu sineriak tamakkerlugu aaqqiiniarnermi aamma tunngavilersuineri tunngaviusinnaalluni.

Allatut naatsumik oqaatigalugu nunatta iluani angallanneq tamakkiisumik malunnaateqarluartumik akikillisaavigineqarsinnaavoq dkk 3-400 miliuuninik aningaasaliinikkut.

Silaannakkt angallannerup nutaamik eqqarsaatigeqqinnissaa Partii Naleqqamiit partiinut tamanut kaammattuutingaarput aamma paaserusupparput, silaannakkt angallanneri kiffartuusinnissamik isumaqatigiissutip sivittuinnarlugu ingerlateqqiinnarneqartarnera qanoq aningaasanngorlugu naleqarnersoq ?

Taama oqaaseqarluta suliap pingajussaanneeraneqannginnerani aningaasaqarnermut akileraartarnermullu ataatsimiititaliami suliareqqinneqarnissaa inassutingaarput.

